

四庫全書

集部

欽定四庫全書

集部

宋詩紀事卷四十五

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣牛稔文

謄錄監生臣黃鑫

欽定四庫全書

宋詩紀事卷四十五

錢塘厲鶚撰

陳淵

淵字知默初名漸字幾叟南劍州沙縣人瓘之從孫紹興五年賜進士出身累遷右正言終宗

正少卿有默堂集

錢清堰待潮

江潮來去自有時扁舟閣淺心如飛岸容霜竹青照眼

春信梅花香撲衣天寒鄞江道路阻歲晏錢清風俗非
故園回首二千里落日看盡行雲歸

題綠波亭

南浦江波綠陽關柳色青夕陽千古恨分付短長亭

寄內

明月向人圓愛之不能睡坐久風露寒忽忽心如醉念
君一適我所遇無歡意況乃久別離相思到夢寐我生
百不堪謬學屠龍技于今半世人升斗亦未遂賴有室

中友素懷隱居志肯與梁伯鸞扁舟共東逝

天姥寺

浮雲作秋陰細雨如朝霧放形山水間意適無艱步忽
遇古招提空翠森回互倚杖聽泉鳴悠然不能去

季修舍舟趨諸暨謁劉元成獨泛錢清江有懷其
人

人遠牛羊暮春深草樹滋野橋低映水浦岸曲縈籬風
雨江湖思乾坤杖履疑論心竟誰是短棹欲何之

邑中諸公見和再用前韻

看盡愁人萬點紅
曉來雙鬢白于茸
他時儻記江南夢
畫我黃梅細雨中

錢唐江

潮頭駕月衝殘夢
水色浮空送峭寒
十幅輕蒲連夜發
不知身到海門山

以上默堂集

題善山院

拄頤長劒上凌煙
自古功名亦偶然
鍾鼎山林俱不惡

一瓢可飲盡吾年

延平府志

秦梓

梓字楚材檜弟歷知台秀袁太平常湖六州除翰林學士出知宣州再移湖州進資政殿學士致仕

溧陽貞女祠

史氏之女生寒門白璧粲粲貞義存上無所天漂為業春風三十報母恩斬奢艾尚白日昏子胥脫身閒道奔

遠來困窮乞于此分以壺漿救虛餒子胥還吳雪讐恥
貞女可憐身已死一飯之德古必償遺以千金投瀨汜
謫仙高才解幽沈奕奕宮碑照江水有客停舟臨古祠
涼飈動木興遐思蕉黃荔丹幾千古煮蒿悽愴若見之
更憐扶目人已去姑蘇臺上草萋萋

貞烈集

鄭樵

樵字漁仲莆田人居夾漈山中自稱溪西逸民
紹興中以薦召對給札歸鈔所著通志書成入

為樞密院編修官有夾漈遺橐

北山巖

西風洩洩片雲閒一夜寒泉臥北山倚杖巖頭秋獨望

稀疎煙壠是人間

興化府志

黃公度

公度字師憲莆田人紹興八年進士第一簽書

平海軍節度判官累仕考功員外郎有知稼翁

集

悲秋

萬里西風入晚扉
高齋悵望獨移時
迢迢別浦帆雙去
漠漠平蕪天四垂
雨意欲晴山鳥樂
寒聲初到井梧知
丈夫感慨關時事
不學楚人兒女悲

知稼翁集

包孝肅清心堂

千里有餘刃
一堂聊賞心
庭虛延遠吹
簷敞受繁陰
休吏簾初下
忘懷機自沈
人間足塵土
無路到清襟

肇慶府志

分水嶺

嗚咽流泉萬仞峯
斷腸從此各西東
誰知不作多時別
依舊相逢滄海中

肇慶府志黃公度為秘書省正字貽書臺官言者謂其譏訕時政罷為主管台州崇道觀過分水嶺有詩云云及公歸莆趙丞相鼎謫居潮陽譏者傳會其說謂公此詩指趙而言將不久復偕還中都也秦檜怒令通判肇慶府

題嵩臺二絕

四山如畫古端州
州在西江欲盡頭
漫道江山解留客
老夫歸思甚東流

松菊壺山手自栽二年羈宦客嵩臺無端卻被東風誤

又作恩平一夢回

廣東通志

陳俊卿

俊卿字應求莆田人中紹興八年進士累遷尚書右僕射同中書門下平章事兼樞密使淳熙二年除少保判建康府以少師魏國公致仕卒贈太保謚正獻有集

共樂堂

在興化軍治西州峯之顛為城中登眺勝處

共樂堂前花木深，登臨當暑豁塵襟。
紅垂荔子千家熟，翠擁篔簹十畝陰。
老退已尋居士服，清歡時伴醉翁吟。
憑闌四望豐年稼，差慰平生憂國心。

方輿勝覽

哭林艾軒

出為嶺嶠澄清使，歸作甘泉侍從臣。
百擔有書行李重，十金無產橐中貧。
經旬把臂言猶在，昨日題詩墨尚新。
清曉訪君呼不起，寢門一慟淚霑巾。

合璧事類續集

題夾漈草堂

流水三閒屋公曾半席分帝嘗招此老天未喪斯文人
去留青竹山空只白雲升堂時想像金石恍猶聞

蒲陽
文獻

方翥

翥字次雲蒲陽人紹興八年進士調閩清尉召
對除祕書省正字補外卒翥與鹽官施廷先遊
傳楊龜山之學林艾軒亦定交焉

癸酉冬赴部除夜宿信州客舍

隔屋青燈一點明臥聽簷雨落三更無因作得還鄉夢

門外兒童爆竹聲

讀老子

且柅流沙青犢車
蔥蔥佳氣滿城閭
白頭不解家人語
枉學司空城旦書

呈柔立兄

雞犬還家自識村
重營生理長兒孫
時平戰地逢華屋
歲久他鄉是故園
別後塵埃如我老
歸來耆舊幾人存
雁行疇昔從遊者
莫話凋零恐斷魂

以上林廬齋續集

寺中別林謙之兼寄諸鄭

遊從忘朝晡尊酒輕招呼笑語恣玩狎翻覆雲雨疎我
友數君子古心相與娛每見輒賓敬衣裳儼而趨惡石
寓規誡美疾疾佞諛深山足風雨零落梅花株亭亭巖
上松霜姿一何孤感茲各努力勿以歲事徂

蒲陽文獻

句

秋明河漢外月近斗牛旁

楊誠齋詩話林謙之嘗稱其友方次雲句

山寒一杯酒歲晚兩窮人

和鄭處易溪邊贈別

可惜聽泉夜還當

殘月時

游石泉

林肅齋續集

龔茂良

茂良字實之興化軍人紹興八年進士孝宗朝

累除敷文閣待制禮部侍郎尋拜參知政事安

置英州卒後復官諡莊敏有靜泰堂集

靈源菴

遲回不忍去復作抱衾留斷續雲間雨蕭騷木末秋勞

生那有此漸老欲相投最愛千山暮鍾鳴處處幽

蒲陽文獻

王之望

之望字瞻叔穀城人紹興八年進士孝宗朝附
湯思退拜參知政事兼同知樞密院事罷為資
政殿學士知溫州有漢濱集

涪溪中興頌碑

蜀日既衰落日亡前星靈武騰光芒元功百戰兩京復
萬里阿瞞歸故鄉干戈紛紛徧四海涪碑已立湘江旁

太師艱難喜初定作此大字龍鸞翔紙摹縑搨四百載
家家傳寶踰琳琅唐文中世未變古燕許偶儷為班揚
次山之文可也簡此頌未追周魯商祿山滔天等窮澆
春秋之法誅無將騁兵二字斥邊將此語豈足懲姦強
末篇三章頗辭費筆力不復能鏗鏘磨崖勒銘亦何有
反復自贊乃爾詳向來各人過許與舉世附和無雌黃
淮西仆碑無墨客惜哉不得逢鍾王

房公湖

在漢州又名西湖房琯上元間為牧始鑿湖治平間韓樞序云今亭館皆非房公時

事

金雁橋南二頃湖房公遺墨未湮蕪人遊杜牧晚晴賦
境對王維別墅圖經始園林心自巧折衝廊廟術何迂
常時只作幽人計留得陳濤四萬夫

以上方輿勝覽

過石城

滄浪渡口莫愁鄉萬頃寒烟落木霜珍重使君留客意
一樽芳酒對斜陽

江上危亭思黯然追遊陳迹欲經年別來西望應相憶

郢樹荆門共一川

湖廣總志

陳長方

長方字齊之號唯室福州長樂人徙居吳中紹興八年進士終宣教郎江陰軍教授有唯室集題定武本蘭亭

昭陵一入見無從鐫石猶將贗本供八法典刑今在此華山天外立三峯

不須苦恨厭家雞自是鹽車後月題弄筆數行書紙背

莫教人喚庾安西

此甥此舅兩風流翰墨相傳不誤投大似曹溪付衣鉢
臨池他日看銀鉤

蘭亭續考跋吾友胡少明教官以王文正家所得蘭亭惠其甥王立之定武石刻屢經牧守私易此本信非近年樞搨失真者所能髣髴也紹興乙卯上元日閩人陳長方齊之題于笠澤寓舍

葛立方

立方字常之丹陽人徙吳興勝仲之子紹興八

年進士隆興間官至吏部侍郎有西疇筆耕韻
語陽秋歸愚集

避地傷春

洛陽宮闕半成灰
草草花枝濺淚開
國色天香消息斷
妝臺誰奉紫金杯

石門連日動征輦
花柳無情自繞溪
回首故園今好在
杜鵑花落子規啼

新城道中

已去日邊遠宜春程尚賒呼童秣征馬帶月趁啼鴉橋
斷復揭水路窮還渡沙誰能飾廚傳裹飯野人家

以上
歸愚

集

喜子郊登第

吾家五世十三人競擷丹枝撼月輪慶歷賢科開後裔
隆興儒業繼前塵泥金帖報家庭喜燒尾筵開帝里春
從此傳芳應未艾桂香早已襲天倫

余居吳興泛金溪上暇日率同志拏小舟載魚鼈

蝦蟇命五比丘誦寶勝佛名若十二因緣法作梵
唄捨之溪中坐中有請作詩以紀事者余輒為書

云

漁師竟日漁水族作斤賣小捐使鬼兄滿載獲鱗介鯢
鯨未易羅所得亦殊態青蛙盡公私朱鮪無小大霜鱸
尚貫針土負或黏塊輪囷積文螺郭索走蒼蟬溼沫相
响濡自分煮薑芥豈知惻隱人規作江湖貸因呼小青
翰收留舞澎湃趺坐延黑衣號佛指清瀨經飛流水篇

流水長者事
見金光明經

梵起魚山唄傾盆帶寒藻圍圍看于邁

驚疑或依蒲喜躍或生喝快若鷹辭犇歡如囚破械定
非校人池恐是餘不派願汝藉佛力永脫鉤網債口腹
聊爾耳香餌莫渠愛

以上韻語陽秋

李燾

燾字仁父號巽巖眉州丹棱人唐宗室曹王臯
之後紹興八年進士孝宗朝歷官祕閣修撰同
修國史拜禮部侍郎除敷文閣學士致仕卒贈

太師諡文簡

從何使君父子遊墨池分韻得名字

成都縣治前有洗墨池揚

雄草太玄經處

蜀學擅天下馬王先得名
簧如巧言語于道蓋小成子
雲最後出振策思遐征斯文大
一統歛使聖域清富貴
盡在我紱冕非所榮
旁皇天祿閣聊亦觀我生懷哉不
能歸舊宅荒荆榛寂寞竟誰顧
正路今莫行使君蓬萊
仙弭節歸赤城門無俗賓客家有賢父兄
慨念此耆老

不登漢公卿臨池一尊酒尚友千載英拜呼嚴與李月
旦共細評區區可無憾彼重適我輕竭來成都市塵土
汙冠纓古人不可見見此眼自明請為懷古詩玉振而

金聲

成都文類

客懷

寂寞三秋節淒涼萬里風關河盡形勝人物幾英雄秦
葉隨流水周禾滿故宮此心懸象闕夢繞浙西東

久客厭塵土幽居懷翠微只餘清夜夢長作故山歸菊

已開三逕松應長十圍晨鐘忽驚覺猶有露霑衣

曹氏
歷代

詩選

登金山

金山何處好四顧不相連窗迴前無地波澄下有天堂

留三楚客門泊五湖船暝色關詩思江籠兩岸烟

金山
志畧

陳巖肖

巖肖字子象東陽人紹興八年以任子中詞科

仕至兵部侍郎著庚溪詩話

洗行

直榦解新籜低枝蔽舊叢
芟繁留嫩綠引月更添風

庚溪

詩話

范正國

正國嘗為太和通判

重經快閣

時紹興庚申閏燬獨跨牛巷存

僑寓窮滄海心棲快閣閒
煙雲浮四座几席對千山

檻何由見神明悵未還
興崇應有待高躅付誰攀

快閣紀存

王遼

遼壯節王公之孫侑之子

送田諤

兩地音塵隔死生十年常效執珪吟羨君已作遼東鶴
顧我空存魏闕心日下旣蒙新眷遇海邊休忘舊知音
儻憐萬里親庭在為向雲山處處尋

蘆浦筆記王復字景仁淄川人高宗詔知徐州
尼雅滿寇徐公領兵閉城拒守城陷不屈為所
殺凡闔門百口俱遇害時建炎三年正月二十
九日也天子震悼特贈資政殿學士諡壯節先是

公長子侑以太僕丞從高宗過淮陽紹興八年
和好成秦乞訪先臣遺骸優詔許之行至泗州
馬上得疾暴卒侑子達留淄川南北隔絕紹興
十年承宣使田諤扈從顯仁太后回鑾遠以詩
送諤云云詩至而侑卒已一歲矣聞者哀之

洪适

适初名造後更今名字景伯皓長子紹興十二
年中博學宏詞科孝宗朝歷尚書右僕射同中
書門下平章事兼樞密使提舉太平興國宮卒
謚文惠有盤洲集

寧國寺

幾日山南北端期汗漫遊水痕秋雨過竹色曉烟收
宦海何時了僧房為少留卻尋歸去路餘興漫回眸

曉發泰安驛

在臨海

秋夢不能曉起行山徑迷小車驚宿鷺列炬誤鳴雞
冷怯霜華重光瞻斗柄低金庭有佳處芳桂想幽棲

題三瑞堂

久矣馳魂夢今登三瑞堂故山有喬木近事話甘棠
展

驥慚充位占熊憶問祥白雲留不住極目是吾鄉

以上盤洲

集

方輿勝覽洪公弼為寧海主簿時建以荷花桃
實竹幹有連理之瑞已而生适故适以貳車行
縣題詩云云

書懷

早歲那知世事艱中原北望氣如山樓船夜雪瓜洲渡
鐵馬秋風大散關塞上長城空自許鏡中衰鬢已先斑
出師一表真名世千載誰堪伯仲間

詩林萬選

洪遵

遵字景嚴皓仲子與兄适同中博學宏詞科賜
進士出身歷徽猷閣直學士出知平江府孝宗
朝召除翰林學士承旨拜同知樞密院事江東
安撫使資政殿學士提舉洞霄宮卒謚文安有
小隱集

丁香花

來自丁香國還應世所稀叢生盛花葉亂結罽巾衣冷

豔璫為色低枝翠作圍蔓連疑鎖骨時見玉塵飛

全芳備祖

洪邁

黃介

許子紹

邁字景廬鄱陽人皓季子紹興乙丑中博學宏
詞科孝宗朝累遷中書舍人兼侍讀直學士院
拜翰林學士進煥章閣學士知紹興府以端明
殿學士致仕卒贈光祿大夫諡文敏有野處類
稿容齋五筆夷堅志萬首唐人絕句行于世

四朝聞見錄洪邁歸鄱陽與兄丞相迨酬唱觴
于林壑甚適偶得史氏璫花種之別墅名曰璫

野樓曰瑤樓圓曰瑤圃

秋日漫興

江湖久客日思家坐覺微霜上鬢華
節序又催秋後雁風光爭發雨前花
倦遊已夢莊生蝶不飲何憂廣客蛇
怪底朝來衣袖薄一川白露下蒹葭

一夕西風木葉飛畫梁落月淡餘輝
銀燈夜照還家夢金剪親裁寄遠衣
霜信早隨新雁至素書深訝故人稀
無因為謝東曹掾鱸熟蓴香莫便歸

野處類稿

鎖院同業晦叔作無簡謝景思

紹興十九年晦叔為福建帥屬予嘗

因春補諸生白于府主邀與同考校鎖宿貢院兩

旬

沈沈廣厦清如水市聲人聲不到耳一閒十日豈天賜
慙媿紛紛白袍子相逢更得金玉人久矣眼中無此士
連牀夜語不成寐往往雞聲忽驚起是中差樂真難名
昔者相過安得此但憐時節不相謀正墮清明寒食裏
梨花已空海棠謝外閒物色知餘幾只恐風雨摧折之
負此一春吾過矣謝公尋山飽閒暇應笑腐儒黏故紙

錦囊得句應已多萬一相思頻寄似

容齋三筆

車駕宿戒幸玉津園命下大雨將曉有晴意已而
天宇豁然至晚歸邁進一詩歌詠其實

五更猶自雨如麻無限都人仰翠華翻手作雲方悵望
舉頭見日共驚嗟天公的有施生妙帝力堪同造物誇
上苑春光無盡藏可須羯鼓更催花

容齋五筆

和朱子淵賦石柏

海底靈根石效奇山經地志不曾知凝紅幻出珠千顆

染紫裝成玉一枝鶴骨龍姿隨質見鸞棲鳳宿與香宜
元戎高唱真難和媿我年來筆力衰

夷堅志

寄題兄景伯清閼堂

台州通判廳

昔聞王子猷借宅亦種竹此君固可喜人亦清不俗伯
氏貧而癯一飯不飽肉堂前自經始護此無盡綠一官
歲強半餘日如轉燭待其長稚子而已牽歸轂何由享
嘉蔭償我志願足應煩彼邦人日報平安福

赤城志

王龜齡王嘉叟木蘊之同過小園用郡圃植花韻

節到中和暖尚賒東風隨後起芳華自慙翳翳松三逕
相對蕭蕭馬五花老去醉鄉為日月年來痼疾在烟霞
午橋別墅歸公手早定淮西取白麻

文翰類選

泛舟遊武夷九曲

武夷之山如畫圖中有玉洞藏仙都一溪穿空舞澎湃
九曲度盡方盤紆細看直疑路中斷已轉始覺川平鋪
諸峯削成鳥亦怖危磴豈復人能踰機巖學館第傳授
鼓樓石牀知有無坐令丹梯化一鶴又喚立筍成三姑

遊人來觀但借問道士指說猶驚呼神君曾孫在何許
想見幔亭空藥爐千崖萬壑心賞倦正喜松風清坐隅
歸舟瞥然箭脫手醉目眩我雙明珠

武夷山志

秀川館聯句

并序

鄱陽洪邁景盧還自衡岳道宜春買舟東下永嘉方
雲翼景南置酒秀川館餞之邵武黃介景達開封向
藩巨源歷陽許子紹季韶與焉坐中屬聯送行且強
景盧同之人賦十許韻賓主皆醉不復續惟巨源止

酒不開涓滴獨又唱出八十字以成章且書之明日
以遺景盧云紹興二十七年九月乙亥景南序

江聲牀搖寒山色窗拗綠

方

歸舟著沙邊客夢遶鄉曲

洪

簪盍豁秋悲筵開從夜卜

黃

黃花散疎籬蒼竹圍破

屋

向

詩豪爭擊銅談劇屢消燭

許

借君五言城洗我愁

萬斛

方

主人意無窮客子去敢速

洪

杯寬怯鯨吞詞澀

媿貂續

黃

注瓦亦傾銀聯珠仍綴玉

向

天迴月明洲霜

清風隕木

許

飛齊水擊鵬揮退日斜鵬

方

臭味漆投膠

芬芳蘭閒菊

洪

味甘一嚮嘗話勝十年讀

黃

未用賦驪

駒方看舉鴻鵠

向

行當歲九遷勿憚晝三宿

許

妙語子

蟬媽孤蹤吾鹿獨

方

一老上星辰三君進鳬鶩

洪

平生

仰高山此夕霑賸馥

黃

飛龍十九章金馬三千牘

向

儻

非論石渠定是讐天祿

許

筆健翻狂瀾辯雄噴飛瀑

方

抄傳疲小胥侍立倦更僕

洪

力舉六螯連肘運千兔禿

方庖廚洗玉盤萍豆鄙金谷

向

豈無麟脯羞亦有熊蹯

熟

同

不須羅羶葷安用窮水陸

許

搜尋到蹲鴟飪飪無

苜蓿

方

但畏酒樽空寧知更漏促

黃

勸頻難固辭意厚

敢虛辱

許

一一罄餅壘紛紛吐茵蓐

方

茶甘旋汲江火

活乍然竹

向

聊烹顧渚吳更試蒙山蜀

洪

清風生玉川

石鼎壓師服

黃

忍醉興方新語離情轉篤

洪

明朝轉船

頭西風飽帆腹

黃

去櫓響嘔啞歸車聲軋軋墨突諒難

黔曹裝行復促便揚武林鑣勿戀番江策聖神攬權綱

賢俊登肅穆

向

君恩晉接三臣職坤用六

方

夷路合騰

驤上心資啟沃

許

吾道竟何憂斯文欣有屬

洪

執政猶

股肱天官乃眉目當堦紅藥翻規地青蒲伏遙知此數
途歷徧財一蹙長吟美且箴細酌壽而祝端期千一逢
毋諱再三瀆德進朝廷尊河潤京師福前修庶拍肩能
事當繼躅君無廢此篇隨車編卷軸

向

袁州府志

句

天上長留滕六在人間會有葛三來

因學紀聞野處雪句葛三事出太平廣記葛仙
翁第三子

向
瀦

藩字巨源開封人有葵齋雜藁

從吳傳朋遊芝山登五老亭以駕言出遊分韻賦

詩得駕字

茲山何巍巍氣欲等嵩華從公二三子勝日飽閒暇
躋攀謝車輿自辦兩不借捫蘿覓幽磴行椒得孤榭側送
夕陽移俯視高鳥下登臨記曩昔歲月驚代謝卻數一
周星復命千里駕身從泛梗流事與浮雲化竭來共一
尊似為天所赦明發還問塗合離足悲叱

題吳傳朋遊絲書

先生著名節百世追延陵我評先生賢不以能書稱功

成磨蒼崖盛德頌日昇勿書凌雲榜華顛踏高層

以上容齋

三筆

方雲翼

雲翼字景南永嘉人

題寶積寺

暫脫塵閨馬足埃僧窗高臥白雲堆青山影裏春醒解

黃鳥聲邊午夢回坐嬾且推書冊去吟清時喚茗甌來
要知門外無車轍十日新生一逕苔

袁州府志

李端民

端民字平叔

和元微之春遊韻寄洪景伯

東閣經年別窮愁客路難望塵驚岳峙懷舊各雲散茵
醉恩逾厚檣鼓興未殘馮唐嗟已老范叔敢言寒玉燭
調魁柄陽春在筆端應憐埽門役白首滯江干

容齋五筆

葉南仲

紹興乙丑仲春遊崧臺作

斗峯遙憶舊崧臺為勸農耕特地來短李高名光翠壁
偽劉陳迹沒蒼苔洞天日永風埃淨巖壑雲收霽色開
好景最宜供宴樂操觚欲賦媿非材

崧臺石室志

胡憲

憲字原仲文定公從子紹興中貢入太學賜進士出身授左迪功郎添差福州教授以母老求

監南嶽廟歸起為福建路安撫司屬官復請祠
秦檜方用事家居不出檜死以大理司直召未
行改祕書正字既至病不能朝詔改秩與祠歸
卒學者稱籍溪先生

荅朱元晦

幽人偏愛青山好為是青山青不老山中出雲雨太虛
一洗塵埃山更好

濂洛風雅朱子跋云右衡山胡子詩也初紹興
庚辰某卧病山間親友仕于朝者以書見招某

戲以兩詩代書報之曰先生去上芸香閣閣老
新我旁角冠留取幽人臥空谷一川風月要人
看甕牖前頭列畫屏晚來相對靜儀刑浮雲一
任閒舒卷萬古青山只麼青或傳以語胡子子
謂其學者張欽夫曰吾未識此人然觀此詩知
其庶幾能有進矣特其言有體而無用故吾為
是詩以箴之庶其聞之而有發也明年胡子卒
又四年某始見欽夫而後獲聞之恨不及見胡
子而卒請其目也因叙其本末而書之于策以
無忘胡子之意云

胡宏

宏字仁仲文定仲子幼事楊時侯仲良卒傳其
父之學紹興中以廕補右承務郎卒學者稱五

峯先生有集

題上峯寺

百年身似客浩蕩世閒遊入望青山好夢魂偏我留我
家巫山十二峯浮江直過巴陵東瀟湘水與蒼梧通環
遶衡嶽青冥中扁舟白雲不可度杖藜蠟屐乘春風山
光浮動可攬結雲舒霞卷飛煙虹深巖大壑翠巘巘足
力已到心無窮羣峯迤邐勢不競上盡祝融五千仞祝
融峯高天更高太空人世如牛毛風雲萬變一瞬息紅

塵奔走真徒勞

西林寺廓然堂有懷

超然峯頭秋氣清廓然堂延秋月明我乘清秋弄明月
中有所感思冥冥峯勢凌蒼穹上有烟林封去天不盈
尺路斷心忡忡虛名過耳如松風

以上五峯集

李侗

侗字愿中南劍州劍浦人從羅仲素遊學者稱
延平先生諡文靖有語錄行世

和靜菴山居

勝如城市宅花木擁簷前一雨曉來過羣峯翠色鮮採
荆烹白石接竹引清泉車馬長無跡逍遙樂葛天

延平府志

李 繒

繒字參仲號鐘山婺源人所著有論語西銘解
義等書朱子尊稱之

曉步

曉步閒隨蛺蝶行村南村北雨新晴山花野草自幽意

布穀一聲春水生

新安文獻志

張元幹

元幹字仲宗長樂人向伯恭之甥紹興中坐送
胡邦衡詞得罪除名有蘆川歸來集

苔溪漁隱叢話余宣和間居泗上于王周士處
見張仲宗詩一卷因備錄之後三十年于錢唐
與仲宗同館穀初方識之因戲謂仲宗曰三十
年前已識公子詩卷中仲宗請余舉其詩渠皆
不能記反從余求之

夜宿宗公丈室求詩甚勤為賦五字

林表登層閣，秋聲聽暮鐘。
鴉鳴苦竹寺，雨闇亂雲峯。
屢乞留新句，重來訪舊蹤。
松門罕車馬，似喜老夫逢。

次韻晁伯南飲彥達官舍心遠堂

今夕知何夕，真成累十觴。
爐薰飄月影，蜜炬剪花香。
政嬾還詩債，無從發酒狂。
故人憐久客，舞袖要須長。

以上
蘆川

歸來集

瀟湘圖

落日孤烟過洞庭，黃陵祠畔白蘋汀。
欲知萬里蒼梧眼，

淚盡君山一點青

艇齋詩話

鄭汝諧

汝諧字舜舉青田人紹興中進士官吏部侍郎
徽猷閣待制致仕有東谷集

題盱眙第一山

忍恥包羞事北庭奚奴得意管逢迎燕山有石無人勒
卻向都梁記姓名

齊東野語南北通和時聘使往來旁午于道凡
過盱眙例遊第一山酌琉璃泉題詩石壁以紀

歲月遂成故事，鐫刻題石，幾滿紹興癸丑國信使鄭汝諧一詩，可謂知言矣。

題石門洞

每移征棹並雲根，便覺幽懷謝世喧。
皓色飛來天際雪，紅塵不到水邊門。
破荒康樂名猶在，紀勝元章字不存。
但有好山容老子，何須更訪武陵源。

括蒼彙紀

蘇雲卿

雲卿廣漢人，與張魏公浚為布衣交，紹興閒結廬南昌之東湖灌園，織屨自給，人稱曰蘇翁浚。

為相訪知所在馳書函金幣屬洪州帥漕禮致
之翁力辭不可期以詰朝上謁比遣使迎之則
扃戶閤然排闥入則書幣不啟家具如故翁已
遁矣

還張德遠書幣題詩蔬圃壁間

多年別作一番風誰料聲名達帝聰自有時人求富貴

莫將富貴汙蘇公

四朝詩

米友仁

友仁一名尹仁字元暉自稱嬾拙老人襄陽人
芾之子紹興中擢工部侍郎終敷文閣待制

畫繼云米友仁元章之子幼年山谷贈詩曰我
有元暉古印章印利不忍與諸郎虎兒筆力能
扛鼎教字元暉繼阿章遂字元暉宣和中為大
名少尹所作山水草草而成不失天真風氣每
自題曰墨戲被遇光亮既貴甚自秘重衆嘲之
云解作無根樹能描懵懂雲如今供御也不肯
與閒人

題楔帖

圖契朴瑀推聖智萬古奔沈餘末伎蘭亭醉墨更無加

始信功名皆儻爾，庾翼兒郎豈不黠？自是家雞慙野雉，
退之強聒六藝疎。見處纔能到姿媚，相公有官那得取。
不與官家深自祕，卻因同好露心胸。謾使蕭郎誇末計，
摸金不必曹阿瞞。溫韜家有昭陵器，披沙只恐取黃金。
剔軸誰能收故紙，天章寶塔高嵯峨。永表文皇好文藝，
至今油蠟傳未休。善本何辭萬金弃，

盧蒲筆記

題定武本蘭亭

翰墨風流冠古今，鵝池誰不賞山陰。此詩雖向昭陵朽，

刻石猶能直萬金

紹興十六年歲次丙寅懶拙翁米元暉在行朝天慶觀東私居之北窗跋

蘭亭續考

自題大姚村圖

廣文當日官雖冷可柰才名振世何
他日君家須炙手而今聊復雀堪羅

老年尚喜管城子更愛好山江上青
武林秋高曉欲雨

正若此畫雲冥冥

紹興戊午李春十一月書于大姚五湖田舍

自題山水

霄壤千千萬萬山東南勝地熟躋攀古人作語詠不得

我寓無聲縑楮間

結興已未除守郡郡待次平江寓居大姚村妹家戲作

寓意編按米氏襄陽人而宋史以爲吳人觀海岳撰樂園臺表云予昔居郡與先生遊今觀畫跋則米老父子皆嘗居吳故其女嫁大姚其實非吳產也

題董源夏山圖

崇山過新雨蒼翠濃欲滴林深不通人溪迴有吟客日
落古道空天青暮雲碧何處一聲蟬幽棲仍自得

題自畫橫披與翟伯壽

山中宰相有仙骨獨愛嶺頭生白雲壁張此畫定驚倒

先請喚人扶著君

以上清河書畫舫

司馬端衡

端衡溫公後人與米元暉同時

題自畫杜詩意圖

潺湲石澗溜

峯迴石路轉足可娛瞻聽其中如有屋便是醉翁亭

郁氏

書畫題跋記

吳芾

芾字明可自號湖山居士台州仙居人紹興中
進士孝宗朝歷官禮部侍郎終龍圖閣直學士
卒諡康肅有湖山集

見市上有賣海棠者悵然有感

連年蹤跡滯江鄉長憶吾廬萬海棠想得春來增絕麗
無因歸去賞芬芳偶然擔上逢人賣猶記樽前為爾狂
何日故園修舊約賸燒銀燭照紅妝

海棠譜

和胡經仲即事

世事憑誰論羈懷只自諳風烟悲蜀魄桑柘老吳蠶晚
步惜殘照春衫怯曉嵐日來鼙鼓近牢落愈無堪

赤城詩集

北望二首

延福池臺荆棘深上皇無復更登臨寂寥崇觀當年事
愁絕關河萬里心

漠漠黃雲塞草稀年年空說翠華歸孤臣淚盡仍嘗膽

白首江湖雁北飛

台州府志

熊克

克字子復建陽人紹興進士累除起居郎兼直
學士院

壽芮祕書三首

帝調玉燭召春還仙袂同時度九關萬品欲霑何處得
東風今起道家山

歸來未對小延英便向蓬萊作主人要督仙宮讐玉籍
卻收衆妙入經綸

冊府都無未見書毫端萬斛瀉明珠若為池上星辰履

謾與瀛洲作畫圖

翰墨大全

沈樞

樞字持要

一作持正

德清人紹興間登第歷官太

子詹事

百福寺

孝豐縣東南

築室最高處軒窗八面通鑿山流乳液開戶納薰風巾

履隨涼設茶瓜與客同我來資解慍不羨楚王雄

湖州府志

仲并

并字彌性江都人紹興中進士歷光祿寺丞准
東安撫司參議有浮山集

句

政恐崖州如有北卻應未肯受讒夫

因學紀聞仲彌性詠韋執誼不看嶺南圖詩誅
森疎之蕭斧也

唐文若

文若字立夫眉山人庾之子第進士仕至直敷
文閣知溫州遷中書舍人孝宗朝參贊張浚都

督府軍事卒

登金山

江流出岷蜀萬折東南傾茲山若巨舫勢欲扼滄溟天
高象教尊海岳朝百靈雲水渺四極下上涵日星朱甍
倚霄漢倒影魚龍驚重遊十年舊挂席鷗鳥驚維揚魏
公幕回首劒戟明行都望北固鐵甕高崢嶸孤舟繫烟
月六尺僧窗橫印師支遠儔靜對如風鈴曠懷憐此翁
得法世慮平塵勞霜鬢禿風月冰壺清乞詩寫崖壁指

月雙浮萍

金山志畧

陳世守

世守字端厚崑山人

紹興壬申五月臥病東禪之北窗惟庭柯相對手
植綠橘枇杷皆森然出屋枇杷已著子橘獨十年
不花各賦一詩


枇杷昔所嗜不問甘與酸黃泥裹餘核散擲籬落間春
風折句萌樸椒如榛菅一株獨長成蒼然盛屋山去年

小試花瓏瓏犯冰寒化成黃金彈同登桃李盤大釣播
羣物幹流不作難樹老人何堪挽鏡覓朱顏頷髭爾許
長大笑鼓巾冠

綠橘生西山得自髯翁家云此接活根是歲當著花俛
仰乃十霜垂蠹紛相遮芳意竟寂寞枯枝謾槎牙風土
諒非宜翁言豈余夸會令反故山高深謝汚邪石液滋
舊根山英擢新葩黃團挂霜實大如崆峒瓜當有四老
人來駐七香車

崑山雜詠

湖集 鷄按二首又見范成大石



宋詩紀事卷四十五

欽定四庫全書

集部
宋詩紀事卷四十六

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣牛稔文

謄錄監生臣袁繼升

欽定四庫全書

宋詩紀事卷四十六

錢塘厲鶚撰

周紫芝

紫芝字少隱宣城人紹興中登第歷官樞密院

編修右司知興國軍自號竹坡居士有太倉稊

米集及竹坡詩話

方萬里跋少隱嘗謂作詩先嚴格律然後及句
法得此語於張文潛李端叔

越臺曲

玉顏如花越王女自小嬌癡不歌舞嫁作江南國主妃
日日思歸淚如雨江南江北梅子黃潮頭夜漲秦淮江
江邊雨多地卑濕旋築高臺勻曉糝千艘命載越中土
喜見越人仍越語人生腳踏鄉土難無復歸心越中去
高臺何易傾曲池亦復平越姬一去向千載不見此臺
空有名

方輿勝覽在建康府縣西七里今尉廳後故老
相傳云昔越王女嫁於此懷土思歸故越王築
臺以居之慰其懷土之思

秋蘭

藝蘭當九畹蘭生香滿路
紉君身上衣光明奪縑素
孤芳一衰歇凋零濕秋露
佩服君子心亦足慰遲暮

弔洪氏女并兩侍兒

就死由來不自疑
玉顏那爲賊鋒低
了知今日投淵婦
猶勝當年斷臂妻

敵騎駸駸戰艦嬌
春江漫漫濕金翹
但將紅袖供歌舞
卻爲周郎笑二喬

梁溪漫志中興死節之士固不乏而女子守節者亦多有之洪鴻父羽之女適繁昌焦浦一日遇巨盜於江中欲逼之女義不受汙投江而死兩侍兒大曰宜恩小曰勻奴姓吳氏女兄弟也俱有色藝亦相隨赴水死焦之甥徐伯遠傳其事竹坡周少隱為之賦二詩云云

黃文若攜秦別駕侍兒像見過戲題二絕

能事空傳王右丞句如徐庾轉難名
明眸正似溪光樣自古無人畫得成

謝家林下小梅花不著紅藍染絳紗
莫笑畫師無國手玉肌元不愛鉛華

題錢少愚四畫

鴛浦

一點傷春恨看成兩鬢霜如今無此夢莫畫兩鴛鴦

釣雪

一作東吳去回頭又十年可憐江上雪空落釣魚船

蘭亭

事去空千載何曾有若人只應煙樹裏便是永和春

秋觀

雨足三湘岸煙含七澤秋可能無尺地分得庾郎愁

以上太倉
稊未集

題淨空院

誰穿巨石貯清泉不見超公舊講筵
龍伴白雲歸寶藏
魚隨流水下春田

咸淳臨安志

元忠作單于下程圖

單于獵罷臥錦紅解鞍休騎荒磧中
蒼駒騶駱六十匹
隱谷映坡分尾驂
九駝五牛羊頗倍沙草
晚牧生寒風

貴賤大小只五百執作意態皆不同二鷹在臂二鷹架
駿犬當對能爭功氈廬鼎列帳幕擁鼓角未吹驚塞鴻
上山高高置烽燧毛囊貯獲閑刀弓水泉在側挹其上
長河杳杳流無窮素紈六幅筆何巧胡瓌畫妙誰能通
今日都城有別識別識共許劉元忠

許貴州出蘇叔黨樹石

老坡騎鯨上天去小坡落筆如風雨能添老樹著巖間
為石傳神自翁語兩坡俱死真可惜君有一拳何處得

誰向九原呼此翁為我五日畫一石

以上聲畫集

題湖上壁

寒食風埃滿客巾西湖煙雨送愁頻日高未起烏呼夢

春晚不歸花笑人

前賢小集拾遺

戲作小詩用少陵事

百尺寒松老幹枯韋郎筆妙古今無何如莫掃鵝溪絹
留取天吳紫鳳圖

竹坡詩話使少陵尚無恙當為我一捧腹也

句

設客元無琴裏曲供官尚有篋中詩

太倉稊米集云東坡嘗言古今語未有無對者
琴家謂琴聲能娛俗耳者為設客曲項時有作
送太守詩者僕嘗問之其人曰此供官詩不足
觀于是設客曲乃始有對戲作俳體詩云云

關耆孫

耆孫字壽卿蜀人紹興間進士官著作佐郎

送劉朝美侍郎歸蜀

清議久不作世無公是非祇因翻故紙不覺蹈危機東

壁夢初斷西山巖正肥十年成底事贏得載書歸

庚溪詩話兵部侍郎劉朝美儀鳳蜀之普州人
性酷嗜書喜傳錄初以禮部侍郎攝祕書少監
後即真凡祕府書籍傳屬殆徧如國史之類又
置副本親自校讎至杜門絕交還兵侍猶傳屬
不絕張持國之綱為副端言其書癖至曠廢職
事以是罷歸蜀閬壽卿以詩贈行
鶚按宋史劉儀鳳傳亦載此事

劉 惔

惔字寬夫吉水人沆孫紹興進士官至待制

青原臺

在廬陵郡西射圃東南隅

春臺百尺枕蕪城傑檻層軒入紫清坐嘯風雲生畫棟
劇談河漢瀉朱甍山圍蘭若青螺遠江帶蘋州白練橫
挂席會凌南斗去羽人遼海看騎鯨

豫章詩話

陳鵬飛

鵬飛字少南永嘉人紹興進士官太學博士崇
政殿說書忤秦檜謫居惠州卒有羅浮集

文獻通考陳氏曰秦檜子熺嘗從之游在禮部
時熺為侍郎文書不應令鵬飛輒批批還之熺浸
不平鵬飛說書崇政殿因論春秋毋以子貴言
公羊非是檜怒謫惠州以殁

贈邕管察推陳仲輔

幕下誰人識果之微聞贊畫向蓮池登樓不恨鄉關遠
挂笏只言山色奇直道自能消鬼魅高人何處不軒義
佗年坐上話銅狄可是蓬萊清淺時

惠州府志

唐仲友

仲友字與政金華人登紹興進士復中宏詞科
累官知台州為同官高文虎譖于提刑劾罷主
管武夷沖道觀有說齋集

遊蓋竹山

在台州臨海縣

籃輿東出初雨收衆山捲霧奔蒼蚪麥田濛濛連千疇
去年見種今有秋農家挽大即快活使君不去能無羞
春光欲盡誰挽留千林蕤蕤新綠柔桐花遠近澹無色
自開自落那關愁洞天為我暫晴霽使我蠟屐窮冥搜
天門發秀萬馬下水口離立羣峰稠瀑泉對面瀉絕壁
寶劍卻倚丹鳳樓溪聲噴薄雷震動石色古怪神剜鏤
洞門谿研風颼颼香爐峰下蛟龍湫中岑特秀小為貴

左右旌節森戈矛幾時祕奧一日睹談笑指示君知不
精廬但欲占勝處專事棟宇非良謀飛閣跨水納佳氣
突兀殿堂居上頭軒窓高下有奇致洗滌肺腑明雙眸
我將于此棲羽流鳳笙鶴駕應來遊丹成一舉凌九州
下視濁世如浮漚靈祠款謁路阻修層巖傾澗邃且幽
經營輪奐亦未就揮金爾助何須求晚雲漠漠鳴雨鳩
僕痛泥滑吾欲休虹橋列炬趣歸騎城鼓已報初更籌
追攀別乘聊復爾乘興何如王子猷習池不為倒載去

兒童不用拍手攔街謳

赤城志

折彥質

彥質字中古雲中人涇原帥可適之子紹興閒
官樞密使爲趙鼎所薦秦檜指爲黨謫昌化軍

後移郴州復官

過太平州拜李端叔遺像

東來遂數月弛擔已渺茫猶喜蓄患身獲登先生堂肅
衣拜遺像依然雙頰光宛若侍坐側妙語發天藏厄窮

出天意人理難度量所幸言不朽與世爲文章齎此復
何恨私淑良不忘小郎出見我問知雛鳳凰他年起門
戶塵滓濯秋陽世事幾變滅人生真黃梁置之不足道
感慨涕淚滂我行方有程墳山空相望

跋浯溪造極圖

浯溪未到已登臨筆力能窮造化心我是零陵新逐客
披圖一一可追尋

跋湘西清絕圖

與山分淺正傷神
蠟屐明朝陌上塵
誰寫湘西清絕景
巧移林壑慰行人

以上聲畫集

湘山

寓久渾忘客臨行似別家
途窮身更怯秋老鬢先華
生計黃茅合歸期碧海賒
湘山今夜雨留我意無涯

桂林府志

超然亭

超然亭上鬢毛斑
浩蕩秋風小立閒
豈為詩情堪過海
祇緣腳力要尋山
峭峰斷續天容缺
高壘縈紆地勢慳

回首不堪東北望桂林萬里是秦關

粵西詩載

謝許君瑤

東坡遺物來歸我兩手摩挲思不窮
舉取吾家阿堵物愧無青玉案酬公

廣東通志東坡移廉州以茶孟惠許君瑤校為折樞密所得有詩謝許云云

何耕

耕字道夫紹興中守蜀之嘉州有惠政與何逢
原孫松壽宋誨號四循良民繪像祀之

青羊宮

按趙閱道成都記載宮乃老子乘青羊降其地今有臺存焉

一再官錦城咫尺望琳宮未始得得來正墮役役中今
朝弄晴雨策蹇隨春風頗愛意象古停驂小從容縹渺
百尺臺突起凌半空憑闌俯修竹決背明孤鴻信哉神
仙宅不受塵垢蒙稽首五千言衆妙一以通靜觀萬物
復宣假九轉功區區立訓詁亦哂河上公癡人慕羽化
心外求鴻濛要騎白鶴背往訪青羊蹤

題龍華佛閣

西川鑿山三大像突兀皆在江之湄修覺九頂見畧盡
獨此恨未瞻容儀竭來勝地了疇昔輕軒瘦馬相追隨
百尺金軀信雄傑三乘寶閣何瑰奇燃犀不用照幽鬼
擊鼓自合趨馮夷前人開創願力廣下與舟楫扶傾危
六月灘濤劇奔吼一分性命爭毫釐篙工落膽行者泣
彈指乞活天人師人心狎水水多禍佛力在人人不知
慈悲但作布施想江神雖怒將何為

普通山距府東十數里青州禪師洪杲道場也自

龍華歸過之棟宇頽落僧徒鄙野良為可惜是夜
雨大作因書所聞所見為長韻

錦城之東山培塿突起伽藍壓山口入門氣象頗不凡
在昔規模定非苟黃絹碑詞著眼看青州老衲知名久
自披榛徑結茅屋不翦霜華散蓬首市門有女捧巾盥
衣襪無花生穢垢至今一轉鵲鴿語散作諸方獅子吼
祖燈寂寞何人繼宰堵岩峩惟鬼守法席草長深沒膝
僧榻屋穿光見斗似聞占籍多衍沃合選名緇振頽朽

我來不覺三歎息眼底盡空諸所有自開簾席掃塵空
聊寄閒眠慙奔走夢回中夜雨鳴檐卧聽東風寒入牖
明朝散步轉山脊好語相呼閑野叟抽芒已見麥翻浪
擣麴懸知香滿手須臾日影散林樾絢練春光被花柳
僕夫催歸屢不應景物殊佳寧忍負出山騎馬更躊躇
乘暇應須重載酒

以上成都文類

李 彙

彙紹興中添差台州通判

游九鎖山

何人能識洞中天勝地興從漢武年石作雙門標俗駕
路為九鎖折溪泉四山松檜相迴合五洞煙霞暗接連
浮世功名何日已挂冠來結此山緣

洞霄詩集

鄭昌齡

昌齡紹興中太府寺主簿

李忠定公挽詩

炎圖第一相蕭公王謝風流愧下風力正君臣先偽楚

不將金帛問和戎
輸忠自昔忘夷險
注意如今見始終
駐馬佳城天莫問
寒空慘淡沒孤鴻

梁溪集附

吳岡

岡紹興中閩縣尉

李忠定公挽詩

夢卜庸真相艱難
倚大儒英風起
衰懦直氣懾姦諛
琳館終高臥
燕然漫壯圖
哀榮看贈典
猶足慰寰區

梁溪集附

頓起

起汝南人紹興中提點西川刑獄

贈成都寓舍賢婦二喻詩

嘗聞趙清獻恤孤慰亡友至今西蜀人談美不容口二
喻出儒家清貧一無有零丁依老母破屋僧堂後相對
誦詩書未嘗窺戶牖圭折玉彌方山寒松更茂縣宰初
聞名咨嗟為之久從容語其配夫人曾見否長者二十
三次亦十八九青裾長蔽膝荆簪短在首我欲效清獻
言不為人取近於吾邑中選壻得豪右夫人相宰意魚

欽定四庫全書

宋詩紀事
卷四十六

十三

疏薦尊酒屈致二喻來呼名老與壽

長曰安壽
次曰安老

女子當

有行詩稱遠父母飢寒日月長蓬華風雨漏大喻前致
詞灑淚濕衣袖荷德固已深絨情亦湏剖上言親未葬
心欲土自負下述妹未笄嫠嫠無傳姆還家復獻書自
叙貧且陋鉛華世所悅銅臭非吾偶肯效閭閻閑碌碌
逐雞狗世無梁伯鸞應嫌孟光醜孔明若再生承女甘
箕帚陳義一何高夫人驚拊手至今書橐在光輝射星
斗董子慕高風喜曰真吾婦吾親雙白髮吾弟室未授

睦言姊妹賢可以相先後五兩幣雖輕意則千金厚輜
軒雙造門觀者競奔走女子尚能爾男兒宜自守重聘
或不來豈欲終畎畝畜德尚未充高位亦虛受寄語事
君者慎勿輕去就

成郝文類

范浚

浚字茂明蘭溪人紹興閒舉賢良方正以秦檜
當國不起學者稱曰香溪先生有集

讀長門賦

阿嬌負恃顏姝好那知漢帝恩難保一朝秋水落芙蓉
幾歲長門閉春草自憐長世等前魚舊寵全移衛子夫
獨夜不眠香草枕東箱斜月上金鋪曉驚永巷車音近
失喜疑君在瑤軫臨風望幸立多時卻是輕雷聲隱隱
年年織女會牽牛百子池邊侍宴遊自從一落離宮後
無復穿鍼更上樓

凌霄花

栽松待成陰種漆擬作器人皆笑艱拙往往得後利君

看植凌霄百尺蔓柔翠新花鬱煌煌照日吐妍媚風霜
忽搖落大木亦凋瘁視爾託根生枯莖無殘蒂先榮疾
蕭瑟物理固難恃凌霄亟芳華衰歇亦容易

以上香溪集

馬純

純字子約自號樸檟翁默之孫紹興中為江西
漕隆興初以太中大夫致仕居越之陶朱鄉有

陶朱新錄

題能仁寺壁

十年衰病卧林泉
鷓鴣羣飛競刺天
黃紙除書猶到汝
固知清世不遺賢

會稽志僧宗昂住會稽能仁寺有故相寓寺中已而復相宗昂被敕住持郎官馬子約題詩法堂壁

呂愿中

愿中字叔恭紹興中知靜江府

宋史秦檜傳靜江府驛名秦城愿中率宿僚賦秦城王氣詩媚檜由此得名

郡守呂叔恭以甲戌季春七日游中隱嵩山水膏

育之興未已後兩日再拉機宜劉子思監州朱國
輔經屬陳朝彥同至新洞所見愈奇真所謂倒餐
甘蔗聊書五十六字

爽塏虛明小洞天巉嵒垂乳類鋒鋷薰風習習來三面
夏雨蕭蕭欠一檐指顧羣山勞應接徘徊歸騎縱觀瞻
門前綠水泓澄淨底處應湏是谷簾

桂勝

蔣 璨

璨字宣卿宜興人之奇從子紹興中以集賢殿

修撰知蘇州除敷文閣待制提舉洪州玉隆宮
沖寂觀去南莊數里肇建於有唐逮今數百年中
閒衰弊吾家曾祖太傅公為司出納且主盟興起
之相繼累世不墜兵火之後殿宇久廢弗理房舍
荒寂璨今再至不勝感歎故作二詩紹興甲子季
秋某拜呈

兔井橋邊鷁首橫過逢仍怯近鄉情路人失喜交頭語
鄰夫何知掉尾迎重到雲房驚落寞直須金闕早崇成

百年香火追先志始信吾宗世濟榮

慣見琳宮全盛時竭來荒梗倍傷悽虛堂不復瞻遺蹟

自注先考通奉書壁在八蔣院今不復存

敗壁纔容覓舊題

自注伯考樞密太師題三史院

僅留數字

帝傳前修皆槩獲雲孫後裔合攀躋興衰補弊應

商畧徙倚修廊日欲西

式古堂書考

丁宣

一作卜

宣字宗旦延陵人紹興中處州通判

仙都山

世上洞天三十六縉雲第二十九區古木參天駕雲屋
總真靈跡號仙都獨峰壁立三千尺凌空聳翠屹然孤
仰瞻絕頂煙嵐際曾開菡萏名鼎湖舊說軒轅駐車轍
雲輶風馭經此涂石釜烹煉丹砂就乘龍帝鄉在須臾
紫虛碧落超塵世侍臣無路攀龍鬚唐朝天子仙李裔
德格天心來瑞符祥煙嘉氣慶雲布山中九轉萬歲呼
步虛一作對峙雲斷續東西互竦高下殊澗邊幽徑登
鳥道上有鏡巖如方壺崖中乳水瀝嵌罅滴石成穴如

仰盂水一晝夜斛加半潦不泛溢旱不枯魯望曾記周
景復絕粒餐霞黃老徒棲真妙入懸珠會八十年餘隱
此居千古寥寥桑海變仙跡縹緲還有無石門瀑布雖
云好此閒殊甚未易居特然造化鍾神秀虎頭妙手亦
難圖

仙都山志

胡升

升字子上括蒼人紹興閔官湖北提舉

仙都山

鼎湖不可見巍然但孤峯特立亘萬古氣壓諸山雄黃
帝久得仙游行跨飛龍至今世俗傳尚指輦路通頗如
昇天檜追求白鹿蹤常言貴荒唐厥見真兒童顧惟此
山奇實宜仙所宮水聲來冷風和以萬本松客枕久未
穩笙簫滿虛空頗疑九成音不在二典中但恐蚩尤旗
暋暋舒長虹雖能獨不死忍視斯民窮君看涿鹿戰萬
古蒙其功鼎湖何足道帝德彌蒼穹

仙都山志

程元祐

贈朱童子虎臣

浮梁人年九歲紹興間武殿試十二矢中九的講孫子兵法諸葛八

陣圖賜金帶武狀元補承信郎

我聞汪錡生列國能執干戈衛社稷孺子可教緊復誰
張良授書為帝師寥寥厥後不復繼棘門老將反兒戲
邇來忽得朱虎臣九歲知兵及古人僕姑十上九破的
玉帳七書咸誦臆壘石布作常山蛇指陳八陣橫復斜
天姿安勇亞二子腦脂壯士應羞死虎生三月定欺牛
勿謂渠小將何求志在奇功平禍亂自許多多而益辦

欲造天閭試所長中興君相正明良拔萃為將上不惜
好獎此郎明勸激凌烈九歲初無謀猶呼虎子封亭侯
觀君頭領合食肉膽大于軀早驚俗皇家祐武喜逢時
洗眼行看得意時

饒州府志

張表臣

表臣字正民右承議郎通判常州與晁以道遊
紹興中為司農丞有珊瑚鉤詩話

觀高郵寺壁曹仁熙畫水

曹生畫手信有神豪端風雨生齋沄波濤不合來翻屋
鰲鯨何須欲噬人湯湯此水勢方割陽侯鬱怒馮夷搏
鼇擲鯨吐海岳驚霧塞雲昏光景薄開元將軍愛驂騮
權奇滅沒隘九州時危此物豈易得寫此尚可銷人憂
未有乃孫能畫水通客見之心欲死雷奔電擊走中原
魚怖龍愁寧忍視先生道眼高崑崙聊將妙語破迷津
中流險絕待舟楫四海浩蕩須經綸我衰甘作淮海客
身脫垂涎頭雪白驚心未定畏崩湍欲覓平波泛家宅

此身端的老江湖雨笠烟蓑是所圖他年但飽揚州米

今日寧論甕社珠

珊瑚鈞詩話

題睢陽雙廟

漁陽突騎滿關東百戰孤城挫賊鋒唐室興亡繫公等

九原可作更誰從

珊瑚鈞詩話睢陽雙廟俗謂之五侯廟蓋南雷賈與同功皆受封爵亦作其像于廊廡耳古今歌詠唯王荆公黃豫章為警策予官宋城題詩自以為無媿前人

聽琵琶

白鴿潛來入紫槽
朱鸞飛去唳青霄
江邊塞上情何限
瀛府霓裳曲再調
謾道靈妃鼓瑤瑟
虛傳仙子弄雲璈
小憐破得春風恨
何似今宵月正高

珊瑚鉤詩話客有獻李衛公以古木者云有異
公命剖之作琵琶槽其文自然成白鴿予嘗語
晁次膺曰公綠頭鴨琵琶詞誠妙絕蓋自曉風
殘月之後始有移船出塞之曲然某亦曾有一
詩云云公曰詩亦不惡

和陳叔易就晁以道求長松

暫隱嵩高六六峯
未乘雲氣御飛龍
自餐白石求黃石

更採長松寄赤松

句

碧藕連根絲不斷紅蕖著子意何多
山塘莫車水梅

雨正分龍
婺州道中 珊瑚鈞詩話

鄭望之

望之字顧道彭城人官吏部侍郎僑居上饒

揮塵後錄舅氏曾宏父生長綺紈而風流醞藉聞于搢紳長于歌詩贈炙人口紹興中守黃州有雙鬟小鬟者頗慧黠宏父令誦東坡先生赤壁前後二賦客至代詠人多稱之後歸上饒時

鄭顧道呂居仁晁恭道俱爲寓客日夕往來顧道教其小獲亦爲此技宏父顧鄭笑曰此真所謂效顰也

除夕

可是今年老也無兒孫次第飲屠蘇一門骨肉知多少
日出高時到老夫

清波雜志鄭顧道侍郎居上饒享高壽嘗見其除夕小詩親筆云

何偁

偁字德揚龍泉人紹興甲科爲吏部郎官除福

建提舉有玉雪堂小集

王文孺臞菴

多羨王居士心閒事事幽山從天末見江近枕邊流春
圃千葩秀霜林百果收更能窮物理濠上看魚游

柳外長虹臥江邊小市圓水搖千嶂影窗納五湖天隔
岸誰家圃開帆何處船非關臺榭好此地最堪憐

吳郡志

蒙與義

王文孺臞菴

一島風煙水四圍軒亭窈窕更幽奇眼中泉石論溪買
行處壺觴逐境移勅馬虺隤前日路寒松偃蹇舊年枝
自嗟老去殊癡絕一月春愁廢作詩

吳郡志

李彌正

彌正連江人彌遜之弟官吏部郎兼史館

王文孺臞菴和祝鑑韻

勞車發危坂勅艘失飛湍滔滔穠穢子疾走殊未闌鶴
仙擺名宦結廬松江干笑拍萍風浮瞬視草露溥圖川

不媿輞序谷寧先盤門豈俗駕拒室無哀箏彈按行松
菊閒澹然有餘歡蓮巢衆香聚浮天百憂寬秋光斂洲
渚暮翠籠峰巒我来挾良朋道故盟未寒鍊顏仰孤標
耐久同蒼官終當役薪水刀圭卻衰殘

吳郡志

徐作

王文孺臞菴

藜莧幽人室立園隱者居一原青嶂合萬木綠陰疎手
把歸田賦腰懸種樹書桑麻連畛秀網罟入溪漁

吳郡志

程敦厚

敦厚字子山眉山人紹興閒官中書舍人附檜

坐謫

朝野遺記程子山為中舍時秦檜善之一日呼入內閣坐候終日獨案上有紫綾標一冊書聖人以日星為紀賦末有類貢進士學生秦頊呈文采豔麗子山兀坐靜觀幾成誦及晚竟不出乃退子山巨測也又數日差知貢舉乃大悟以此命題乃孫果首選

王文孺臞菴

壁上煙蘿子窓前鴻素書短籬開窈窕嫩竹轉扶疎世

事霜前葉聲名澗底樗柴桑陶靖節日暮荷歸鉏

吳郡志

惜海棠開晚

今年春色可勝嗟二月山中未見花長憶去年今夜月

海棠花影到窻紗

海棠譜

題陳閔中畫明皇太真聯轡圖

並轡春風禁籞遊外閒底事上心頭騎驢後日嘉陵道

料得君王始欲愁

高似孫緯畧

曾惇

惇字宏父紆之子紹興中守台州黃州有詩集

獻秦益公絕句

紹興壬辰既罷三大將議和曾守黃州作

黃泥坂下雪猶深赤壁磯頭江欲平
驛吏西來聞好語番人已出蔡州城

和戎詔下破羣疑無復旄頭彗紫微
屈指銷兵宜有報

先看長樂板輿歸

能改齋漫錄

題東湖

三年領客醉東湖欲去猶攜竹裏廚
誰解挽留狂太守

風荷十頃翠相扶

赤城志

龍溪新亭

懷王知名寺諸峰翠插天
凌雲飛畧杓照水舞蜿蜒
午

日孤穿履新涼定著鞭
更須煩惠遠小立虎溪邊

廣信府志

向瀄

瀄字豐之紹興間為萍鄉令有樂齋詞

莞爾堂夏日偶成

槐影參差日轉廊時看野鳥下橫塘
閒窓綠映簷簷淨

流水紅浮菡萏香座有琴觴真道院徑通花木似禪房
文楸珍簟珠簾裏與子同消夏日長

袁州府志

陳仲平

仲平紹興中知瓊州軍

吏隱堂

在瓊州城北隅仲平建李光命名

海山地僻少迎將心逸身閒白日長儘欲吟哦追沈謝
不求名迹擬龔黃旋移泉石成雲壑時引笙歌入醉鄉
吏散簾垂公事省清風一榻傲羲皇

廣東通志

葉黯

黯字晦叔嘗除敕令所刪定官紹興中為福建

帥屬

和洪容齋鎖院作

文章萬言抵杯水世上虛名徒爾耳我常自笑一生癡
那更將癡笑羣子大屋沈沈餘百年到今所閱知幾士
看渠得失自偶然其閒悲喜從何起君聞我言亦大笑
為說萬事總如此

缺兩句

急湏了卻公家事門外不知

春有幾

缺三句

飛雨時聞打窓紙他年萬一復相從未

必從容今日似

送容齋自福倅滿歸

一門伯仲知誰似四海文章正數君何事與予如舊識
由來于世兩相聞閒官各喜光陰賸勝地空多物色分
忽復翻然從此去便應變化上青雲

此地相從驚歲晚登臨況是客歸時卻將襟抱向誰可
正爾艱難唯子知情到中年工作惡別于生世易為悲

梅花盡醉清江上
黯澹西風凍雨垂
以上容齋三筆

張昌

昌字師言紹興中以參知政事出知潭州

遊真源宮

漠漠山雲閣雨離離澗草搖風看處行穿空翠不妨小
駐孤筇

木末輕風索索雲邊小雨斑斑行盡丹霞林樾皖山下
看鵲山

宋藝圃集

郭浩

浩字充道順德軍中安堡人涇原鈐轄成之子
充渭州兵馬都監紹興中歷金房開達州經畧
安撫使樞密院都統制卒贈檢校少師諡恭毅
隴口作

隴口山深草木荒行人到此斷肝腸耳中不忍聽鸚鵡
猶在枝頭說上皇

蓉塘詩話建炎筆錄云浩按邊至隴口見紅白
二鸚鵡鳴于樹間問上皇安否浩詰其因蓋隴

州歲貢鶚越徽宗置在安妃閣教以詩文及宣
和末使人發還本土二鳥猶感恩不忘浩因賦
詩

陳煥

煥字少微博羅人紹興中特科調高要簿

梅花

雲裏溪橋獨樹春客來驚起曉妝勻試從意外看風味

方信留侯似婦人

肇慶府志

李若川

若川字子至紹興中江南東路轉運判官乾道
初以吏部尚書使金

途中阻雨

高雲無急雨飛灑如絲輕幽人動羈思冒雨登歸程風
來曉烟亂雲破春山明眷言憇荒館我懷有餘情壺中
載濁酒飲罷還自傾酒盡興不盡關關山鳥鳴

理舟

為客始逾月迢迢若經年晝永空館寂古木參雲烟我

生聞道淺未能超世緣念此方寸地憂來相縈纏今晨
動幽興沙岬泊歸船岬遠望不極歸思隨長川

村社歌

清曉鏦鏦鳴社鼓前村後村走兒女田家醵錢共賽神
謝神時晴復時雨案有肴酒爐有香老巫禱祝躬案傍
願得年年被神福秋宜稻穀春宜桑人淳禮簡酒無數
歌笑喧闐日將暮田翁鼓側醉歸來山頭明月山前路
以上前賢小集拾遺

司馬伋

伋字季思紹興中官處州通判淳熙中以敷文

閣待制守蘇州

老學菴筆記紹興末謝景思守括蒼司馬季思佐之皆名伋劉季高以書與景思曰公作守司馬九作倅想即事皆如律令也聞者絕倒

點易亭

在舊治南園

洞天占勝作新亭曲檻危簷揖翠屏四顧風烟入懷袖
一灣溪水抱沙汀羽人不見論平昔雙鶴猶存舊典型

幸得官閒成吏隱何妨續說舊義經 處州府志

送汪尚書大猷歸鄞

憶昔銓衡地為郎得並遊惟公合明陟顧我分夷猶功業行將遂軒車去莫留祠庭固誠請帝眷益綢繆

日者真竒中春風畫鷁行東山須繼起南浦獨傷情越岼江山麗都門祖道榮里閭高臥際趣詔逐追程

寧波府志

陳克

克字子高臨海人紹興中為敕令所刪定官自

號赤城居士僑居金陵有天台集

李庚跋云刪定余鄉人也詩多情致詞尤工
三朝北盟會編紹興七年命呂祉節制淮西軍
馬辟陳克子高為參謀子高欣然應其辟葉夢
得曰呂安老非馭將之才子高詩人非國士也
勸止之不從夢得贈以詩曰解談孫破虜那厭
羽征西克留其家以單騎從軍後鄴瓊之變終
于不免

代王正平從諫掾乞畫凭肩美人扇子二首

道人已悟孩提事棄擲沈兒壞紙鳶聞道近來都識破
丹青便面亦輕捐

難陀已幻登伽女童子猶參蘇密多正士逡巡不應受
可能分供病維摩

跋趙朝議江行初雪圖

我本孤舟蓑笠翁雪崖烟樹一生中如今不向江湖去
關艦旌旗照水紅

謝曹中甫惠著色山水抹胃

曹郎富天巧發思綺紈閨規模寶月團淺淡分眉山丹
青綴錦樹金碧羅烟鬟爐峰香自湧楚客杳難攀政宜

林下風妙想非人寰
飄蕭河官步羅抹
陵九關我家老
孟光刻畫非妖嬈
繡鳳褐顛倒錦鯨
棄榛菅忍將漫汗
澤敗此修連娟緘
藏寄書篆曉夢生
爛斑

曹夫人牧羊圖

日長永巷車音細
插竹灑鹽紛妒恃
美人零落涇水寒
雨鬢風鬟一揮淚
柔毛皦皦與人羣
兒女恩怨徒紛紛
洞房那復知許事
但畫遠牧連空雲
櫛葉飄蕭晚風勁
殺羴相追寒鵲並
短童何處沙草深
族走羣飛各天性

向來鞍馬曹將軍文采斑斑今尚存林下美人更超絕
新圖不作五花文

以上聲畫集

瑞香

佳人在空谷雙星思銀河
契闊不自命盛時豈蹉跎
娟娟廬秀如此繁者何
幽窻下團圞微風自婆娑
寂寥千載初戢戢蓬艾多
何階計方便千金聘綺羅
赤闥青篋舫丁寧護根
窠泥沙亦天幸
扳聯入宣和誰令蘭蕙
徒憔悴守巖阿

苕溪漁隱叢話

陽羨春歌

石亭梅花落如積吐鮫爛斑竹茹赤祝陵有酒清若空
煮粳蒸魚作寒食長橋新晴好天氣西市兒郎擢船戲
溪頭鐃鼓狂殺儂青蓋紅帟偶相值風光何處最可憐
邵家高樓白日邊樓下遊人顏色喜溪南黃帽應羞死
三月未有二月殘靈龜可信滄水乾葑草青青促歸去

短簫橫笛說明年

咸淳毘陵志

返魂梅次蘇藉韻

誰道春歸無覓處
眠齋香霧作春昏
君詩似說江南信
試與梅花招斷魂

老夫粥後惟耽睡
灰暖香濃百念消
不學朱門貴公子
鴨爐烟裏逞風標

漫道君家四壁空
衣篝沈水晚朦朧
詩情似被花相惱
入我香奩境界中

香乘

句

淚眼生憎好天氣
離腸偏觸病心情

贈別

許彥周詩話韓偓溫庭筠未嘗措意及此

鳥聲妨客夢花片攬春心

西溪叢話

臨春結綺今何在屹立巉巉終不改可憐江總負君恩

白頭仍作北朝臣

三品石

苕溪漁隱叢話

姚寬

寬字令威宏弟嵎人以父舜明任補官權尚書

戶部員外郎樞密院編修官有西溪集

春晴

風雨惜春殘新晴為啟關白雲歸去盡還我舊青山

後村

千家詩

春暮送碧雲閣黎歸靈巖

歸意太怱怱逢春去住中澹香花濕雨薄影絮行風覓

句愁何許談玄學未窮因緣知有處祇莫恨飄蓬

詩林萬選

天台夜雨

瘴海遠黏天山城入暝烟春潮生蛤蜊暈夜雨長蝸涎燈

几花時落風簾客未眠平生懷此地今夕意茫然

天台志

古博嶺

在越城西

北風獵獵駕寒雲
低壓平川路欲昏
人馬忽驚俱辟易
一聲乳虎下前村

宿大雄寺

在諸暨縣

解榻無凝塵
雲房愜幽素
清寒薄衾枕
微涼散庭戶
夢彼流水聲
鉤簾捲山霧
時與靜者俱
為擬湯休句

以上
紹興

府志

姚宏

宏字令聲剡人舜明子宣和中在上庠南渡後
初任監杭州稅調知衢州江山縣秦檜以宿怨
追赴大理而死

夢筆驛

江淹舊居

一宵短夢驚流俗千載高名挂里閭
遂使晚生矜此意
癡眠不讀半行書

唐溪詩話云可警後學

錢端禮

端禮字處和臨安人徙台之臨海惟演四世孫
少師忱之子以恩補官孝宗朝累除參知政事
兼權知樞密院事出知紹興府卒諡忠肅

題米元暉瀟湘圖

畫手自高前輩雲山已屬吾曹若會瀟湘物色便合醉

讀離騷

郁氏書畫題跋記

劉岑

岑字季高吳興人高宗朝官徽猷閣待制嘗知

鎮江

皇宋書錄劉公能書縱逸而不拘舊法蓋有自得之趣有娑嚬齋號柯山

齊東野語紹興以來文散階皆有左右字以別有無出身惟嘗犯賊者則去之劉季高得罪秦氏坐賊廢後復去其左字季高署銜不以為媿也

貞女祠

貞女已云遠芳名聞至今烟波瀨江上松栢古祠深暮

色留殘照悲風動遠林謫仙文不死讀罷為霑襟

貞烈集

李茂之

茂之邵武人忠定公綱之子自稱蕭然羈客

侍家君詣洞霄宮道出天竺山紀興

九里松陰路三天竺國山日蒸巖霧紫花點石苔斑谿

盡寺方到雲深僧獨還吟行隨杖履蹤跡出人間

天竺寺志

劉韞

韞字仲固韞之弟以門蔭入仕

建寧府志仲固歷倅三州典二郡歸隱于崇安
縣南所居有家山堂拙致堂昉齋仙人方丈龜
峯樓月波臺積芳園藥園春谷香界晚蔬秋香
徑曲池軒前村秀野朱晦翁為作十五詠以紀

其勝

場南寺

曉起陰霾喜絕收，急忙扶酒為春留。
落花千點野亭寂，啼鳥一聲春事幽。
施食臺高禽易啄，長明燈暗鼠潛偷。
山僧摘茗吹茶竈，留客殷勤學趙州。
建寧府志

劉子翬

子翬字彥沖，號病翁。崇安人。幹季子。以蔭補承務郎，除通判興化軍。尋以宿疾辭歸，與胡憲、劉

勉之講學學者稱為屏山先生有集

吳傳朋游絲書歌

圓清無瑕二三月時見游絲轉空闊誰人寫此一段奇
著紙春風吹不脫紛紛結疑非書安得龍蛇如許矚
神蹤政喜縈不斷老眼只愁看若無定知苗裔出飛白
古人妙處君潛得勿輕漠漠一縷浮力道可挂千鈞石
眷予弟兄情不忘軸之遠寄悠然堂謝公遺髯凜若活
衛后落鬢搖人光翻思長安夜飛蓋醉哦聲落南山外

亂離契闊四十秋筆意與人俱老大政成著腳明河津
外家風流今絕倫文章固自有機杼戲事豈足勞心神

容齋三筆吳傳朋游絲書賦詩者以百數劉彥
沖古風一篇尤為馳騁痛快且卒章含譏諷正
中傳朋之癖

聞箏

月高夜鳴箏聲從綺窓來隨風更迢遞縈雲暫徘徊餘
音若可玩繁弦互相催不見理箏人遙知心所懷寧悲
舊寵棄豈念新期乖含情鬱不發寄曲宣餘哀一彈飛

霜零再撫流光頽每恨聽者稀銀甲生浮埃幽幽孤鳳
吟衆鳥聲難諧盛年嗟不偶況乃容華衰道同符片諾
志異勞事媒棲棲牆東客亦抱淩雲才

遊朱鴈園

晨暉麗丹極翼翼侔帝居向來堂上人零落烟海隅聯
翩際時會振跡皆刑餘閨帷尚帝主阜隸乘軒車流威
被東南生殺在指呼樓船載花石里巷無袴襦至今江
左地風雲亦嗟吁叨榮已過量受禍如償逋荒涼戟門

路尚想冠蓋趨客船維岸柳鄰人罾池魚徘徊極幽觀
曲折迷歸途夜月扃綺戶春風散羅裾繁華能幾時喪
亂實感予曹鄴予何識此曹真人奴

汴京紀事

空嗟覆鼎誤前朝骨朽人間罵未消夜月池臺王傅宅
春風楊柳相公橋

篤耨清香步障遮並桃冠子玉簪斜一時風物堪魂斷
機女猶挑韻字紗

萬炬銀花錦繡圍
景龍門外輭紅飛
淒涼但有雲頭月
曾照當時步輦歸

橋上遊人度鏡光
五花殿裏奏笙簧
日曛未放龍舟泊
中使傳宣趣鄴王

磐石曾聞受國封
承恩不與倖臣同
時危運作高城礮
猶解捐軀立戰功

梁園歌舞足風流
美酒如刀解斷愁
憶得少年多樂事
夜深燈火上樊樓

倉黃禁陌夜飛戈南去人稀北去多自古黃沙埋皓齒

不堪重唱蓬

上聲蓬歌

輦轂繁華事可傷師師垂老過湖湘縷衣檀板無顏色

一曲當年動帝王

瀛奎律髓云不減唐人

題胡原仙山居

寂寂臨湖屋湖風為掩門鳥聲幽谷樹山影夕陽村好

事長留客雖貧亦置尊平生枯淡意出此有誰論

泊舟

莽莽荒茨岸回回亂石灘
雨寒收市早風急泊舟難
寓縣兵猶鬪乾坤網正寬
殷勤囑龍劍莫久卧波瀾

開善寺

寒聲蕭蕭霜葉秋石路磽确穿林幽
雲橫遠岫若平斷風約小溪如倒流
偶經名藍亦終日喜有勝士同茲遊
移牀果茗咄嗟辦杖屨欲歸仍更留

悠然堂

在崇安潭溪

吾廬猶未完作意創此堂悠然見南山高風邈相望
至聊共娛無賓自徜徉

宴坐巖

在潭溪

青青橿樹林下蔭蒼蘚石幽人宴坐時懷抱忘其適不
見暮樵歸寒山雨中碧

以上屏山集

陳晉錫

晉錫明州人紹興十二年進士

題衆樂亭

神襟百慮不容侵勝槩乘閒偶訪尋
趺坐豈無觀水術臨流應有濟川心
斂將蓬島溶溶氣散作陽春字字金
郢曲調高人寡和微生何敢綴雄吟
乾道四明圖經



宋詩紀事卷四十六